

Hjálparliðasjóður

Sjálfsbjargar landssambands hreyfihamlaðra

(hér eftir Sjálfsbjörg Ish)

Reglur sjóðsins

1. gr.

Markmið Hjálparliðasjóðsins (sjóður hér eftir) er að gera hreyfihömluðum einstaklingum kleift að ferðast innanlands og utan á jafnréttisgrundvelli. Þessu markmiði hyggst stjórn sjóðsins ná með því að veita hreyfihömluðum einstaklingum fjárstyrki til að mæta hluta kostnaðar vegna hjálparliða á ferðalögum.

2. gr.

Styrk úr sjóðnum getur sá sótt um sem hefur verið félagi í einhverju af aðildarfélögum Sjálfsbjargar **árinu áður** en umsóknin er dagsett (er skráður virkur í innsendu félagatali til Sjálfsbjargar Ish frá viðkomandi aðildarfélagi). Þá þarf umsækjandi vegna hreyfihömlunar að þurfa aðstoð hjálparliða við athafnir daglegs lífs á ferðalögum.

3. gr.

Styrkinn skal einvörðungu nýta til að mæta hluta kostnaðar við ferðalag hjálparliðans.

4. gr.

Hjálparliðasjóðurinn er eign og í umsjón Sjálfsbjargar Ish. Stjórn sjóðsins samanstendur af þremur Sjálfsbjargarfélögum. Tveir eru kjörnir á Landsfundi annað árið og einn hitt árið. Stjórn Sjálfsbjargar skipar einn þriggja sem formann sjóðsstjórnar.

Framkvæmdastjóri Sjálfsbjargar eða starfsmaður er hann tilnefnir starfar með sjóðsstjórninni.

5. gr.

Meginverkefni stjórnar sjóðsins eru:

- a. Hafa umsjón með sjóðnum og tryggja að ávöxtun hans sé eins og best verði á kosið.
- b. Tryggja að sjóðurinn sé kynntur á vefsíðu Sjálfsbjargar.
- c. Tryggja að auglýst sé t.d. á vefsíðu og Facebooksíðu Sjálfsbjargar Ish. eftir umsóknum a.m.k. mánuði fyrir hvern umsóknarfrest.
- d. Fara yfir innsendar umsóknir og ákvarða í samræmi við verklagsreglur hver(jir) hljóti styrk og hvaða upphæð hverju sinni.

e. Kynna styrkhöfum og umsækjendum niðurstöðuna og afhenda styrkina.

f. Stjórnin heldur fundargerð um fundi sína og skrá yfir umsóknir og úthlutanir hverju sinni.

g. Reikningar sjóðsins skulu færðir í samræmi við góða reikningsskilavenju og samþykktir af stjórn sjóðsins. Þá skal staða sjóðsins og rekstur koma fram í skýringum ársreiknings Sjálfsbjargar lsh. hverju sinni. Reikningsárið er almanaksárið.

6. gr.

Stofnfé sjóðsins er framlag Rauða kross Íslands að upphæð kr. 5.000.000,- (fimm milljónir) í apríl 1997. Tekjur sjóðsins eru frjáls framlög og önnur framlög svo og vaxtatekjur. Sjálfsbjörg lsh. leggur sjóðnum til kr. 200.000.- árlega. Sjóðurinn er eign Sjálfsbjargar lsh.

7. gr.

Sjóðurinn skal ávaxtaður á öruggan og varfærinn hátt á bestu vaxtakjörum hverju sinni.

Einnig er heimilt að Sjálfsbjörg lsh. varðveiti sjóðinn í heild sinni eða að hluta og greiði þá sjóðnum 2% hærri vexti en ávöxtun síðustu tveggja ára hefði gefið honum í viðskiptabanka Sjálfsbjargar lsh. Stjórn sjóðsins ákveður árlega upphæðina sem er til úthlutunar það árið og skal upphæðin aldrei vera hærri en 10% af stöðu sjóðsins um síðustu áramót.

8. gr.

Verði sjóðurinn lagður niður (ákvörðun stjórnar Sjálfsbjargar lsh. og samþykkis Landsfundar) skulu eignir hans renna til Sjálfsbjargar lsh.

9. gr.

Umsækjendur velja sér sína hjálparliða til ferðarinnar samkvæmt eigin forsendum.

10. gr.

Umsækjendur um styrk úr sjóðnum geta bæði verið þeir sem hyggjast ferðast einir (auk hjálparliða) og þeir sem ætla í hópferð, hvort sem það eru ferðalög innanlands eða utan og takmarkast ekki af tilgangi ferðalags.

Takmarkanir á styrkveitingu. Líða verða tvö ár (tvær úthlutanir) milli styrkveitinga til umsækjanda sem áður hefur fengið styrkúthlutun.

11. gr.

Úthlutanir úr sjóðnum miðast við að taka þátt í kostnaði vegna hjálparliða fyrir fargjald, gistingu og uppihald viðkomandi, svo fremi sem hann fæst ekki greiddur af öðrum. Ekki er úthlutað fyrir kostnaði sem opinberum aðilum á vegum ríkis eða sveitarfélaga ber að greiða samkvæmt lögum.

12. gr.

Stjórnin tekur tillit til heildarupphæðar sem er til úthlutunar hverju sinni og fjölda umsókna sem niðurstaðan er að styrkja og annarra ástæðna sem tilgreindar eru hvort um er að ræða úthlutun fyrir öllum kostnaði eða hluta kostnaðar. Þá er einnig heimilt að ákveða að allir

umsækjendur fái sömu styrkuppþæð, enda sé aðeins um hluta kostnaðar að ræða. Styrkinn fær umsækjandi greiddan eftirá gegn framvísun ferðareikninga.

Úthlutun er ætíð endurkræf ef greiðslur úr sjóðnum eru notaðar í annað en sótt var um.

13. gr.

Sótt er um styrk úr sjóðnum á þar til gerðum umsóknareyðublöðum sem er að finna á vefsíðu Sjálfsbjargar Ish. Umsækjandi skal vera hinn hreyfihamlaði sem aðstoðarinnar á að njóta. Í umsókn komi m.a. fram eftirfarandi upplýsingar:

- a. Nafn, kennitala, lögheimili, sími og netfang umsækjanda.
- b. Upplýsingar um hreyfihömlun umsækjanda og eftir atvikum hvaða hjálpartæki hann notar.
- c. Í hvaða aðildarfélagi Sjálfsbjargar umsækjandi er og hvenær hann gerðist félagi.
- d. Stutt lýsing á fyrirhuguðu ferðalagi, hvert og hvenær (tímabil ferðalags).
- e. Raunverulegur eða áætlaður kostnaður vegna fargjalds, gistingar og upphalds hjálparliða.
- f. Nafn á hjálparliða – kennitala-heimili-gms.
- g. Hvers konar aðstoð hjálparliði mun veita.

h. Ef sótt hefur verið um styrk áður, þá hvenær.

Umsóknin fyllist út á eyðublaði sem hægt er að hlaða niður af vefsíðu Sjálfsbjargar Ish.

(www.sjalfsbjorg.is). Tekið er á móti umsóknum í gegn um tölvupóst

(sjalfsbjorg@sjalfsbjorg.is) eða með hefðbundnum pósti.

14. gr.

Úthlutað er úr sjóðnum einu sinni á ári í maí mánuði ár hvert. Umsóknarfrestur er til 1. apríl ár hvert. Niðurstaða stjórnar sjóðsins um úthlutun verður tilkynnt styrkþegum með netpósti eigi síðar en 7 vikum eftir að umsóknarfrestur rennur út.

Í sérstökum tilvikum getur stjórn farið fram á læknisvottorði til að staðfesta hreyfihömlun umsækjanda.

Reglur þessar voru þannig samþykktar á Landsfundi Sjálfsbjargar Ish. 4. maí 2019. Fyrri reglur um sama efni, falla úr gildi á sama tíma.